

Bukan Milik Kita



TARGET VIP

Jangan tunggu sempurna diri, tapi sempurnakan usaha diri.

DOA

DOA PERLINDUNGAN DIRI

الْحَمْدُ لِلَّهِ الَّذِي بِنِعْمَتِهِ
تَتِمُّ الصَّالِحَاتُ

MAKSUDNYA:

"Segala puji-pujian bagi Allah yang dengan nikmat-Nya sempurnalah segala yang baik."

(Riwayat Ibn Majah)

Barang milik sendiri, pasti kita sayang dan akan menjaga sebaiknya. Milik kita bermakna individu lain perlu mendapatkan keizinan terlebih dahulu jika mahu menggunakannya. Kadang-kadang dek terlalu sayang, kita pula berfikir berulang-ulang kali sama ada mahu memberi atau tidak. Hebatnya perasaan sayang ini sehingga kita begitu teliti tatkala perlu memberi.

Nah, bagaimana pula menyayangi diri sendiri? Siapa yang tidak sayang akan diri sendiri bukan? Jika sayangkan diri, katakan dan akui diri ini bukan milik diri sendiri, sebaliknya kita milik Allah. Selamanya tetap menjadi milik-Nya.

Merasakan diri kepunyaan Allah itu sudah menampakkan kita meletakkan Dia dalam diri. Cukup, biarlah Allah kekal Agung selalu. Bila Allah sentiasa didahului, itu petanda diri juga telah berusaha menjadi yang terbaik sebagai hamba. Kita menangkan diri dengan mengalah dan berserah kepada Tuhan, bukan insan.

KITA KEPUNYAAN MASYARAKAT


Wahai pencinta, tanyakan pula kepada diri. Bukankah antara tuntutan Allah kepada hamba-Nya itu untuk menjaga hubungan

manusia sesama manusia? Bahkan insan yang terbaik itu ialah sesiapa yang paling banyak memberi manfaat kepada orang lain.

Jadi, kita faham di sebalik definisi 'kita milik Allah', kita juga kepunyaan masyarakat. Kita harta ummah. Ternyata, hidup ini bukan untuk diri sendiri sahaja.

Manusia memang tidak sunyi daripada kekurangan dan kelemahan. Namun di sebalik kekurangan, ada juga kelebihan. Jauhi dan tinggalkan kekurangan. Sebaliknya manfaatkan dan terus bangunkan setiap kelebihan.

Latihlah kelebihan agar menjadi kebaikan. Tawan pula kekurangan dengan kelebihan yang sudah ada. Anggap dan hargai diri kita dengan meyakini diri ini luar biasa, bukan biasa-biasa.



Hati anggota yang berkuasa. Meski diamnya tersembunyi dan terpelihara dalam diri, namun hati itu punya suara. Kerana itu pastikan hati sentiasa sihat dan positif.

Hati menjadi kekuatan yang terpenting. Hati yang meyakini dan membesarkan kelebihan yang ada dalam diri tak akan mudah rasa kekurangan. Tanyakan hati sama ada mahu, perlu atau mesti untuk memberi kebaikan?

PANDANG ALLAH DAHULU

Ya, wujud dan timbulkan rasa dalam diri dengan memandang Allah lebih Tinggi berbanding manusia. Itulah kekuatan hati yang sebenar, yang merasakan diri ini kepunyaan-Nya. Sungguh pandangan manusia tiada apa-apa. Kita sepatutnya berhajatkan perhatian Allah melebihi perhatian insan.

Melihat manusia akan membuatkan kita mudah kecewa bahkan mudah putus asa jika tidak dihargai. Tetapi tidak bila hati mengutamakan Dia. Kecewa menjadi tidak panjang, perasaan bukan-

bukan cepat pula terusir menjauh. Kita yakini, Tuhan bukan penzalim!

Meski Allah tidak memerlukan kita, bahkan tidak akan pernah berkurangan sedikit pun zat-Nya dengan kelalaian dan kezaliman yang kita perbuat sendiri, namun di sinilah peranan hati untuk mengukui kehidupan bertuhan.


Hati yang cintakan Pencipta, akan membesar-besarkan apa yang diperintah. Menjadi baik dan memimpin orang lain berbuat baik. Ingatlah, berbuat baik di dunia akan kekal untung di akhirat. Bagaimana? Bersihkan hati dengan memandang Allah terlebih dahulu, bukan makhluk-Nya!



'MEMPERALATKAN' INSAN UNTUK MATLAMAT AKHIRAT

Kenapa menjarakkan diri dengan masyarakat? Sedang Allah mengagih peluang sama rata untuk jadi yang terbaik di atas muka bumi. Tidak perlu tunggu sempurna diri, tetapi memadai sempurna usaha. Bukankah bila

berbuat baik di atas muka bumi, maka penghuni langit akan mendoakan?

Lihatlah salah seorang kesayangan Nabi yang dijanjikan syurga. Meski Abdullah bin Mas'ud hanya berperanan sebagai pembawa selipar dan menyediakan air wuduk untuk Nabi, namun beliau menjadi mulia dengan tugas yang nampak biasa-biasa itu. Sungguh Allah memberi kecukupan yang sempurna. Yakini apa yang diperbuat, biar selaras dengan tuntutan Islam.

Tidak salah 'memperalatkan' manusia itu untuk mencapai matlamat syurga. Setidaknyanya kita telah meletakkan sasaran untuk ke syurga yang menjadi pengakhiran dan tempat kembali yang terbaik. 

 facebook.com/WardahSafiah
 zaidlah@telagabiru.com.my

REFLEKSI DIRI

Rasulullah s.a.w. bersabda: "Siapa yang tidak berterima kasih kepada manusia, dia tidak bersyukur kepada Allah." (Riwayat al-Tirmizi)